

# Friburgais e Son Gagliais a la testa

Las duas chombras federalas cun novs timuns

■ (anr/vi) Il pli aut Svizzer appelle-scha al parlament da tadlar meglier sin il pievel e da chattar – suenter il naufragi cun la refurma da rentas e la refurma da taglia sin interpresas – soluziuns che vegnan acceptadas da la maioritad. Dapi ier timuna il cristiandemocrat *Dominique de Buman* la chombra gronda. Il cussegl naziunal ha elegì il politicher friburgais cun 160 da 179 vuschs valaivlas. I saja in privilegi da presidiar il cussegl naziunal, ha ditg Buman. Ed i saja in privilegi per mintga parlamentari d'astgar ademplier il mandat cun pudair s'exprimer en tutta libertad en in pajais preservà tants onns da guerra. Sco combattant per las minoritads linguisticas ha il nov parsura tegnì ses pled en las quatter linguas naziunalas.

Ina da sias tematicas preferidas è il turissem. Attenziun ha il Friburgais survegnì cun la pretensium da scumandar scarnuzs da plastic. Il parlament ha la finala desistì d'in scumond, ma bleras fatschentas grondas èn sezzas daventadas activas e fan uss pajar ils clients insatge per in saget.

Sia carriera politica ha Buman cumenzà cun 30 onns. Il giurist è stà cusseglier da la citad da Friburg e deputà en il cussegl grond. En ils onns novanta ha el battì encunter *Feldschlösschen* che voleva serrar la bieraria Cardinal a Friburg. Dapi il 2003 politisescha Buman en il cussegl naziunal a Berna.

Sco emprima vicepresidente ha la chombra gronda elegì cun 154 vuschs la socialdemocrata dal Tessin *Marina Carobbio* e sco segunda vicepresidente cun 145 vuschs la liberaldemocrata *Isabelle Moret* dal Vad.

La chombra pitschna ha tschernì *Karin Keller-Sutter*. La nova presidenta deriva atgnamain or d'ina regiun ed ina famiglia da la pcd. Ma gia sco studenta è ella stada fascinada dal liberalissem e betg il davos pervi da la tenuta tar l'interrupziun da gravidanza è ella sa decidida encunter la pcd e per la pld.

La giurista ha fatg ina carriera politica classica da la suprastanza communal en fin en la regenza da ses chantun. Dapi il 2011 represchenta ella Son Gagl en la chombra pitschna. Sia elecziun sco presidenta è per il mument il punct culminant da sia carriera. Ella vala sco ambiziosa, retoricamain versada e segira en ses dossiers. Ses onn presidial pudess anc



Dapi ier timuna il cristiandemocrat *Dominique de Buman* la chombra gronda.

FOTOS KEYSTONE



La chombra pitschna ha tschernì *Karin Keller-Sutter* sco nova presidenta.

prender ina vieuta nunusitada, pertge ella è ina favorita per la successiun da cus-

seglier federal *Johann Schneider-Ammann*.